

SCRIPT OF EVENING GOJRI NEWS BULLETIN 23JUNE 1700 HRS

ایونینگ گو جری نیوز بلیٹن مورخہ 23 جون 2025

یوہ آکا شوانی جموں ہے محمد اشفاق تے نصرت تیں خبر سَنو۔

HEADLINES

۱۔ مرکزی وزیر ڈاکٹر جتندر سنگ نے کہیو ہے جے گزریا 11 براں مانہ تکنیک بھارت غی ترقی مانہ اہم کردار ادا کر رہی ہے۔

۲۔ ادھمپور پولیس نے یو اے پی اے غے تحت جاری دہشت گردی کی تحقیقات غے دوران ایک غیر منقولہ جائیداد مانہ ضبط کرلیو ہے۔

۳۔ وزیر تعلیم سکینہ اتو نے طلباء کی بہتر آمدرفت تے تعلیمی معیار مانہ بابدو دین خاطر حکومت کا عزم مانہ دوہرایو۔

۴۔ جموں کشمیر مانہ سیاحت کی واپسی گے پیش نظر ڈوڈھ کی جئے ویلی مانہ متی تعداد مانہ سیلانیاں گو خیر مقدم کیو ہے۔

JITENDRA SINGH

سائنس و ٹیکنالوجی کا مرکزی وزیر مملکت ڈاکٹر جتندر سنگھ نے کہیو کہ گزشتہ 11 براں مانہ ٹیکنالوجی بھارت غی ترقی غی طاقت بن گئی ہے نوی دہلی مانہ ایک پریس کانفرنس تیں خطاب کرتا واں اُنہاں نے کہیو 2014 مانہ صرف 50 بایو ٹیک کمپنی تھیں جہیڑی بن بدھ غے 10 ہزار تیں متی ہو گئی ہیں ڈاکٹر سنگھ نے کہیو بھارت غیاصل طاقت اس غی حیاتیاتی تنوع ہے جہیڑو بھارت غو خاص خزانو ہے۔ اُنہاں نے یوہ وی کہیو کہ نوا بھارت نانہ بنان مانہ سائنس نوی ایجادات تے حکومت کا نظام مانہ بہتری ان سب غو بڑو کردار ہے۔

LG TRIBUTE

ایل جی گورنر مونج سنہا نے اج ڈاکٹر سیاما پرساد مکھرجی نانہ اُن غی برسی ور خراج عقیدت پیش کیو ہے ایک سماجی میڈیا پوسٹ مانہ ایل جی موصوف نے بھارت نانہ ایک مربوط تے جدید بھارت بنان مانہ اُن کا اہم کردار کی تعریف کی ہے اُن نے مزید کہیو جے اُن کی خدمات عوام نانہ فلاح و بہبود خاطر آگے بدھن مانہ رہنمائی کریں۔

ITOO EDUCATION

وزیر تعلیم سکینہ اتو نے اج تعلیم کا شعبہ نانہ بہتر بنان خاطر حکومت کا عزم مانہ دوہرایو ہے اُنہاں نے کہیو جے ہم تعلیم کا معیار نانہ بلند کرن تے اس گل نانہ یقینی بنان ور روجو دے رہیا ہیں جے سرکاری اداراں مانہ طلباء نانہ قابل اعتماد آمد و رفت خطر وسائل سمیت تمام ضروری سہولیات تک رسائی حاصل وے وزیر موصوفہ نے یاہ گل کشمیر مانہ 5 ڈگری کالج واسطے وقف بسان غے دوران لئی ان بسان گو مقصد دور دراز علاقوں توں لاکھ تک طلباء نانہ آسان رسائی فراہم کرنو تھو اس بارے گل کرتا واں اُنہاں نے اس طرح کہیو۔

GCW GANDHINAGAR

نوجواناں مانہ روز گار نانہ فروغ دین واسطے اج گاندگی نگر جموں مانہ کواتین غا گورنمنٹ کالج

مانہ روز گار فراہم کرن واسطے ایک پروگرام منعقد کیو کیو جس نانہ کلسٹر یونیورسٹی جموں تے دیش بھگت یونیورسٹی پنجاب غا اشتراق تیں منعقد کیو اس پروگرام غو افتتاح ایڈیشنل چیف سیکرٹری شانت منو نے کیو اس موقع ور 50 تیں زیادہ سٹالز لایا گیا جن مانہ مختلف شعوباں مانہ نوکری فراہم کرن آلا تربیت دہنگان تے رہنمائی کرن آلا موجود تھا۔ تقریباً 2500 طلبہ نے اپنو اندراج کرایو ٹیلی کام بینکنگ تے تعلیمی اداراں جیسا مختلف شعوباں تیں 57 کمپنی اس پروگرام مانہ شریک ہوئی یوہ روز گار میلو طلباں نانہ نوکری انٹرنشپ تے تربیت غا مواقع فراہم کرن واسطے منعقد کیو کیو تھو تانجے تعلیم تے صنعت غے بشکار فاصلہ نانہ کہٹ کی وجاسکے اس موقع ور گل کرتا واں ایڈیشنل چیف سیکرٹری شانت منو نے اس طرح کہیو۔

SPECIAL FEATURES 11YRS OF GOVT

بھارت سیوا سوشاسن تے غریب کلیان گا اصولاں گے پیش نظر اک دہائی توں ایک قابل ذلر تبدیلی تو گزر رہیو بے یاد رہ جے آکاشوانی نیوز تھارا واسطے اہم شعباں مانہ سرکاری طرفوں کی گئی کوششاں نانہ گزریا 11 براں توں ایک اہم خصوصیت پیش کرے تے اج آکاشوانی ملک کی اقلیتی برادری غی جامع ترقی تے اُن انہ باختیار بنان خاطر بھارت کی کوششاں ور تھاری تو جو حاصل کر رہیو بے واضع رہ جے گزری دہائی مانہ حکومت نے تعلیم اقتصادی طور ور باختیار بنان تے بنیادی ڈھانچہ مانہ اقلیتی برادریاں کی ترقی خاطر برا اہم قدم چایا ہیں تے پردھان منتری جن وکاس کاریا کرن گے تحت 18 ہزار تے 4 سو کروڑ توں متا پروجیکٹاں نانہ منظوری دتی گئی جد کہ 752 کروڑ توں متا رعایتی قرضہ قومی اقلیتی ترقی واسطے مالیاتی کارپوریشن غے ذریعے قریب لکھ 74 ہزار افراد توڑی پُجایا گیا تھا تے اس غے نال نال وقف ترمیمی ایکٹ 2025 تے اُمید پورٹل جیسا چایا گیا قدمان نے معمولات مانہ شفافیت نانہ فروغ دتو بے تے جیو پارسی دے بدھست ڈیو لیمنٹ پلان جیسی سکیم ثقافت نانہ برقرار رکھیں تے عوام غی جامع ترقی مانہ اہم کردار ادا کریں۔

UDH PROPERTY ATTACHED

غیر قانونی سرگرمیاں غی روک تھام واسطے ایک برا قدم غے تھت ادھمپور پولیس نے اج دہشت گردانہ سرگرمیاں تیں جُڑی جائیداد نانہ قبضہ مانہ لے لیو ہے۔ مارا ضلع نمائندہ غے مطابق یاه زمین محمد شفیق ساکن قدرواہ غیہے جہیڑو اس وقت عدالتی حراست مانہ ہے۔ سرکاری حُکام غے مطابق ہُن یہ جائیداد نہ بیچی جاسکے نہ کرایا ور دتی جاسکے تے نہ ہی کسی غے ناں منتقل ہو سکے۔ یہ کاروائی غیر قانونی کماں مانہ شامل پیشہ غا نظام نانہ ختم کرن واسطے ایک اہم کوشش ہے تے تفتیش غے دوران مزید تعلقات وی باندھے آریا ہیں۔

DODA TOURISM

ضلع ڈوڈہ مانہ سیاحت ایک بار پھر تیں بحال ہو رہی ہے کیونجے بہدرواہ غی جنی وادی مانہ زائرین غی تعداد مانہ تیزی سنگ اضافو ہو رہیو ہے خاص طور ور پہلگام دہشت گرد حملہ غا 2 ماہ بعد ڈپٹی کمشنر بدویندر سنگھ نے دسیو کہ لیفٹیننٹ گورنر منوج سنہا غی ہدایت

ور سیاحاں غو اعتماد بحال کرن واسطے اقدامات کیا گیا۔ محکمہ سیاحت غا اشتراک سنگ گُجھ مشہور شخصیات نانہ علاقہ غی سلامتی نانہ فروغ دین واسطے مدعو کیو گیو۔ انتظامیہ تے مقامی قبائلی برادریاں غی خوشش رنگ لیا رہی ہے بُن جئی وادی مانہ تقریباً 4000 روانہ سیاح آرہیا ہیں جس تیں مقامی معشیت نانہ فروغ لب رہی ہے۔ اس موقع ور گل کرتا وان ڈی سی ڈوڈہ نے اس طرح کہیو۔

PM MKB

وزیر اعظم نریندر مو دی مُلک تے بیرون مُلک رہ رہیا بھارتی شہریاں سنگ آئندہ 29 جون نانہ آکاش وانی ور من کی بات پروگرام مانہ اپنا خیالات سانجہ کریں گایاہ ماہوار ریڈیو پروگرام غی 123 ویں قسط وے غی۔ لوگ اپنا خیالات تے تجویز ٹول فری نمبر 1800117800 ور ڈائل کر غے روانہ کر سکیں۔ اس توں علاوہ نریندر مو دی ایپ یاہ فر مائی گوو اوپن فورم ور وی اپنا خیالات تے تجویز روانہ کی جا سکیں۔ یہ تجویز اس مہینہ غی 27 تاریخ توڑی ہی قابل قبول وین گی۔ یوہ پروگرام آکاش وانی، دور درشن، اے آئی آر نیوز ویب سائٹ تے نیوز آن انر مو بائل ایپ ور نشر تے ٹیلی کاسٹ کیو جائے گو۔ اس توں علاوہ یوہ پروگرام اے آئی آر نیوز، ڈی ڈی نیوز تے وزیر اعظم غا دفتر تے اطلاعات و نشریات غی وزارت غا یوٹیوب چینل ور وی براہ راست نشر تے ٹیلی کاسٹ کیو جائے گو۔ آکاش وانی اس پروگرام غی بندی نشریات غے فوراً بعد اس نانہ علاقائی زبانان مانہ وی نشر کرے گو۔

PROG ANNOUNCEMENT

علاقائی خبراں آلو شعبو آکاش وانی جموں 24 جون 2025 منگلوار آلی تہاڑے 12 بج غے 30 منٹ ور اوپریشن سندھو ور 20 منٹ غو ایک خاص پروگرام پیش کرے غو اس دوران اس پروگرام گامہمان جموں کشمیر گاسننیر صحافی دنیش منہوترا ایران تے اطراعیل بشکار موجودہ تناز گے دوران اوپریشن سندھو ور تفصیلی گل بات کریں گایا رہے اس اوپریشن غے تحت ایران تیں متا سارا بھارتی شہریاں نانہ باحفاظت اپنا مُلک آئیو گیو ہے یاد رہے اس پروگرام گی میزبانی اینکر وجے بجاج تے ابھیلاشا شرما کریں غی یوہ پروگرام آکاش وانی جموں توں میڈیم ویو 303 میٹر یعنی 990 کلو ہٹز تے ایف ایم اشاریہ 3 میگا ہٹز ور نشر کیو جے غو۔

PMFME RAMBAN

پی ایم ایف ایم ای غے تحت رام بن مانہ محکمہ باغبانی منصوبہ بندی تے خرید و فروخت شعبہ غی طرفوں مقامی کاروباریاں کساناں تے نوجواناں خاطر بیداری ورکشاپ غو انعقاد کیو گیو اس دوران مذکورہ افراد نانہ فلاحی اسکیم غا فائداں متعلق بیدار کیو گیو۔
